

四庫全書

史部

欽定四庫全書

唐大詔令集卷二十九

宋 宋敏求 編

皇太子

冊太子赦

景雲元年冊皇太子赦

開元三年冊皇太子赦

開元二十六年冊皇太子赦

立成王為皇太子德音

貞元二十一年冊皇太子赦

元和四年冊皇太子赦

元和七年冊皇太子赦

長慶二年冊皇太子德音

太和七年冊皇太子德音

加冠

皇太子加元服制

皇太子加元服宴百官詔

改名

皇太子諸王改名勅

齒曹

皇太子國子監釋奠詔

皇太子詣太學詔

冊太子赦

景雲元年冊皇太子赦

天下公器非上聖無以運其機域中大業非元良無以固其本朕欽若靈命寅奉神宗屈已順人用安四海承祧主宅實貞萬國頃者象臻大憫在疚為憂獠獍滿朝豺狼塞路武職戎政必任兇徒國要時權咸畀逆黨社稷之守望絕苞桑忠義之懷誰其艾棘階禍稔惡伺隙乘間煩言碎辭所不稱述皇太子諱正氣凝姿端命毓德自家刑國英徽日湛移孝為忠雄謀電發北軍馳入掃攬搶於紫微南宮反正開日月於黃道平亂寧夏翼

戴朕躬一旅不勞功逾復禹百神咸舉事邈興周聲應
吹銅望歸當璧今遣司空讀冊命侍中授璽寶由立義
豈曰尚親承華肇開元嗣以建宜申存雷之澤仍紀景
雲之瑞可大赦天下改唐隆元年為景雲元年内外官
子為父後者賜勲一轉公卿各舉孝友忠正堪任東宮
官一人

開元三年冊皇太子赦

黃門朕聞王者神器天之大業震百里而崇孟侯昭四

方而建元子其所由來尚矣我國家參天貳地濟以豐
功祖武宗文承於密命顧循菲德寅畏鴻名太上皇帝
服以位卿大夫輔朕之闕僉率先自述稽古為新國本
不可以不立故宵衣當寧聞義是將朝服升階擇賢而
舉皇太子嗣謙生知禮樂性成仁孝子孫之愛則敬不
絕馳問豎之安則恭而至寢觀其言精視牘思敏題鞭
固以覆東序之討論契南山之調護今少陽踐位獻歲
發春草樹自樂乾坤交泰副君之勝已別其宮太史之

書更藏於府帝圖斯永人望所歸庶符知予之明豈獨
在予之慶用施寬詔光於政理今望苑初開端僚是切天
下有高才懋德碩學純儒比跡春卿齊名夏啟具以徵

辟正
月

開元二十六年冊皇太子赦

制曰自昔聖人恭有神器必立儲兩崇其繼明所以尊
宗廟而重社稷也朕獲纘休運丕承寶厯五聖之業敢
不克勤萬邦之本期諸永固是以式尊彝訓乃擇元辰

太子瑱植性溫恭因心孝友文武之道既著君親之義以弘有命之初咸聞慶躍興言士庶能叶朕心是用擇以吉辰申之冊命思惠率土以暢休期可大赦天下自開元二十六年七月二日昧爽以前大辟罪已下罪無輕重已發覺未發覺已結正未結正繫囚見徒常赦所不免者咸赦除之比年以來十道採訪使道官人惡狀以其微瑕為終身之累豈得永無甄叙許以自新宜令御史臺及刑部大理寺參詳所犯輕重類例條奏內外

文武職事官九品以上各賜勲一轉五品以上子為父
後者亦賜勲一轉其忠王府官及侍讀侍文侍書除賜
之外二品以上賜爵一級四品以下各加一階仍並即
與改轉緣冊命行禮官各賜物有差今月番見上飛騎
萬騎監門直長三衛引駕細仗執扇黃衣長上等各賜
勲一轉驍騎番兵各放免一番天下耆老八十以上各
賜粟三石帛三段百歲以上賜粟五石帛五段並加板
命至如磧西行人途路遙遠往復勞敝頗異諸軍其中

願長往者已別有處分訖年鎮向滿應合放還未到之間稍宜優假其家內諸色差料並宜放免如有營農不自辦者州縣量事借助各使存濟京畿近輔百役所出雖庶務簡省終異於諸州其百姓等應單貧下戶者特放今年半租率土之內賜酺三日

立成王為皇太子德音

守器為重擇賢而立萬國由其永貞百王以之垂範蓋以重社稷而奉棗盛也朕纘承鴻緒惟懷永圖丕膺皇

極既符域中之大茂建元儲用崇天下之本皇太子倣
植性恭懿因心孝友文武之德克聞於日躋君親之誠
實表於天性時屬艱阻義扶宗社故能外清氛祲內復
皇圖由是肇啟承華懋昭嘉緒今撰辰斯及冊命攸行
宜承繼明之慶俾廣滂雷之澤可大赦天下頃者頻興
大典累洽殊私率土之間屢經蕩滌猶慮近有抵犯或
滯狴牢其天下見禁囚徒以上罪一切放免内外文武
官三品以上賜爵一級四品以下各賜加一階五品以

上官子為父後者賜勲兩轉頃緣國用不足頒賜未周
今所鑄新錢數盈於萬其京官文武五品以上及常參
官六軍將士東京留守及諸道節度將士等各賜有
差其唐元功臣成都元從及朕元從功臣等普恩之外
更賜一爵四品以下更加兩階其在靈州及寧州至鳳
翔者仰所司類例更遞加一等皇親及諸色陪位人各
賜勲兩轉其鴻臚番客共賜絹一千疋天下義夫節婦
孝子順孫旌表門閭終身不事京官五品以上各舉忠

正孝友文儒周慎堪任東宮官者務取實才不得濫薦今
餘寇未殄有脅在賊中未歸順者一切不以為罪其有
受賊節制能以兵降者酬其封爵且為政之要求賢是
急比令中外薦舉多非實才所以詢事考言登科蓋寡猶
慮巖穴之內尚有沉淪宜令所在州縣更加搜擇其懷
才抱器隱遁丘園並以禮徵送如或不赴具以名聞凡
與前勅目相當一切委内外文武五品以上有所知者
不限人數任各薦聞如自舉者亦聽於所在投狀有堪

任用不限常資其行人家及羸老單貧鰥寡惇獨已頻
有處分宜令州縣長官倍加優卹應緣冊職掌要重者
及撰冊書舁寶官禮官等普恩之外賜勲兩轉其禮儀
使特賜一階副使普恩之外賜爵一級勅文有不該者

所司類例奏聞

乾元元年十月

貞元二十一年冊皇太子赦

鄭絀

門下惟先哲王光有天下必正邦本以立人極必建儲
貳以承宗祧所以啟迪大猷安固鴻業斯前代之令典

也皇太子純繼體秉哲恭敬溫文德協元良禮當上嗣
朕奉丕訓憲章成式永惟社稷之重載考春秋之義授
之七鬯以奉粢盛爰以令辰俾膺茂典今冊禮云畢慶
感交懷思與萬方同其惠澤可大赦天下貞元二十一
年二月二十四日已後至四月九日昧爽已前天下應
犯死罪特降從流流已下遞減一等文武常參官并州
縣府官子為父後者賜勲兩轉古之所以教太子必茂
選師傅以翼輔之俾法於訓辭而行其典禮左右前後

罔非正人是以教諭而成德也給事中陸贄中書舍人
崔樞積學懿文守經據古夙夜講習庶叶於中可充皇
太子侍讀天下孝子順孫先旌表門閭者委所管州縣
各加存恤五嶽四瀆名山大川委所在長吏量加祭祀

元和四年冊皇太子赦

朕丕承寶圖撫有方夏夙夜寅畏不敢荒寧永惟祖宗
之鴻業歷考前王之令典思所以垂統立極事神保人
推明至公安固大本尊廟祧而主乇毫嚴社稷而奉藻

盛俾開春闈乃命元子斯古今之通誼也皇太子寧
清明體仁莊敬好禮服典謨之誼一君親之誠允諧
詢謀用建儲貳爰以吉日冊於明庭鼓鐘載和文物
大備盛禮云畢慶感良深是宜布澤申恩自中達外
厥有前躅舉而行之自元和四年十月十八日昧爽
以前天下應犯死罪非殺人者降從流流罪已下遞
減一等左降官未經量移者與量移文武常參及諸
州府長官子為父後者賜勲兩轉應緣冊禮行事官

賜階及勲爵有差鄧王府官量與進改夫輔翼元良
教諭成德使目睹正事耳聞正言形於施為漸於心
術非齋莊忠慤之士不在茲選工部侍郎歸登給事
中呂元膺並踐履端正行義修潔通於經訓而得其
要達於教化而蹈其中侍講承華師範磐石訪乃公
議副予精求並可充皇太子諸王侍讀登宜加一階元
膺宜賜紫金魚袋天下孝子順孫先旌表門閭者委所
管州縣各加存恤五嶽四瀆名山大川委所在長吏量

加祭祀

元和七年冊皇太子赦

崔羣

王者司牧黎元紹膺統緒必建儲貳以貞家邦故春秋
垂冢祀之文易象著震方之位朕屬承景運嗣守丕圖
稽前王之令模奉列聖之懿訓上以嚴宗祧之顧下以
繫億兆之心無疆之休用崇主鬯祇荷成憲敢怠於懷
皇太子恒忠孝溫文率義由禮寬粹莊重自誠而明慶
靈所積姿器夙茂能辨南陽之牘允符東海之貴承華

載啟命以居之選吉展儀神人允洽舉是典冊授之軒
墀百辟在庭四方來賀以言承序所感則深永惟固本
為慶滋大宜弘欽恤之令以覃命賜之恩與衆共之無
思不被自元和七年七月十七者昧爽以前天下應犯
死罪非殺人者遞減一等左降官流人並與量移如因
流貶所亡沒及得罪之人並任歸葬文武常叅官及諸
州府長官子為父後者賜勲兩轉應緣冊皇太子行事
官加階賜勲爵有差文武常叅官及陪位官并宗主諸

親賜勲一轉遂王府量與進官春闈毓德肇錫嘉名磐
石聯華義深敦序澧王寬宜改名憚深王察宜改名悰
洋王寰宜改名忻絳王察改名悟建王密改名恪夫習
近遷性聖賢所慎詳觀古昔輔正元良必惟其人朝夕
講訓然後明君臣父子之道通禮樂教化之情自非學究
宗源行可師範則無以應茲茂選式是儀型其皇太子
及諸王侍讀宜委中書門下精擇以二人具名奏聞天
下孝子順孫先旌表門閭者及高年廢疾者委所在州

縣各加存卹五岳四瀆名山大川委所在長吏量加祭祀布告遐邇咸使聞知

長慶二年冊皇太子德音

朕上奉廟祧下寧邦國承列祖垂鴻之慶當累聖夾葉之尊祇膺寶圖敬守丕業體明離立象之重表青宮建嗣之崇元良以貞國本斯固皇太子諱恭孝溫文生知夙稟日者春闈尚曠東序未興朕常訓以義方舉明嚴敬匪資調護已達詩書克保承休爰當主啓膺茲異禮

慶感良深夫踐位少陽允孚明命用弘惠澤庶洽兆人
自長慶二年十二月二十日昧爽已前天下應罪合死
犯除贓降從流流罪以下遞減一等左降官及流人並
與量移亡歿者任歸葬文武常叅官及諸州府長官子
為父後者賜勲兩轉緣冊太子攝太尉稱賀侍中承旨
宣制進中嚴外辨攝中書令讀冊授冊各賜爵一級其
行事職掌官及書寶昇舉冊寶禮儀使禮官等三品已
上賜爵一級四品以下加一階撰冊文官特加一階仍

並賜物有差導引官各加一階鑄造冊寶及禮生等賜
勲有差文武常叅官及陪位并宗子諸親賜勲一轉景
王府官量與進改夫師嚴友善庶發清明習近性遷必
資弘道所以慎簡師傅用保元良其太子侍讀宜委中
書門下精擇二人具名聞奏

太和七年冊皇太子德音

門下帝者承天地貞邦國法明離之象固鴻業之本必
命元予以備儲闡斯皇王之令謨古今之丕典朕祇受

眷祐虔恭寶圖欽若彞章光修聖緒皇太子永幼稟仁
智生知孝愛體溫文以立德資敏哲以保躬寬裕有常
貞慎無怠爰膺盛禮俾奉青宮嚴宗廟主鬯之儀遵朝
夕視膳之節冊命云畢感悅良深問安既慶於寢門布
澤宜覃於天下自太和七年八月七日昧爽以前天下
應犯死罪從流流以下罪遞減一等惟官典犯贓及故
殺人劫獄奪囚持杖強盜者不在此限左降官流人並
與量移如因貶及諸色得罪人所在亡歿並任歸葬宗

周之盛實在於維城二漢之隆亦由於磐石自開元以後累聖子孫皆長於深宮罔知稼穡曾不得習詩書以修禮樂交氣類以敎人倫雖有間平之才莫施魯衛之政永言淪廢深疚朕懷諸王等宜以今年已後相次出閣具授緊望已上州刺史上佐觀其才能績有序用人倫所先婚禮為重笄年許嫁別有明文其十六宅諸縣主亦宜選擇良偶以時出適仍委吏部於諸色選人中取情願者揀擇具名聞奏亦當別加優獎令其就禮漢

代用人皆由儒術故能風俗深厚教化興行近日苟尚
浮華莫修經藝先聖之道埋鬱不傳况進士之科尤要
釐革雖鄉舉里選不可復行然務實抑華必有良術既
當甚弊思有改張今寰宇乂寧干戈已戢皇太子方從
師傅授六經一二年之後當令齒胄國庠以興墜典宜
令國子監於諸道搜訪名儒置五經博士各一人其公
卿世族子弟明年已後不先入國學習業不在應明經
進士之限其進士學宜先試帖經并略問大義取經義

精通者次試議論各一首文理高者便與及第其所試詩賦並停其試帖經官便以國志監學官充禮部不得別更奏請弘文兩館生齋郎並依令式試經畢仍差都省郎中二人覆試須責保任不得輒許替代苟涉情故必加罪責卿大夫者羣下之所視遠方之所做若非恭儉克己廉貞化人而望其服從固不可得况朕不寶珠玉不御纖華逮於六宮皆務儉薄卿大夫得不叶朕此志率先兆民比年所頒制度皆約國家令式去其甚者

稍謂得中而士大夫苟自便安身於習俗因循未革以至於今百官士族起今年十月服冬裘以後其衣服輿馬並宜準太和六年六月十七日勅處分如故違制度九品以上量加黜責其布衣五年不得舉選百姓軍人各委州府長吏漸施教化使自遵行不要便為禁制令其驚擾惠養疲民本於廉吏阜其生植在絕貪求其諸道方鎮刺史等有聚歛貨財潛行饋遺者委御史臺糾察以聞仍委度支鹽鐵分巡院同為訪察不得容蔽親

民之官切在守長久於其道政乃有成方鎮刺史三考已下不得輒議替換如理有異等委中書門下訪察就加寵獎如的然可錄者別與甄昇其或政理有乖害及百姓者即不在滿三考限易譏豐屋傳美卑宮雕刻磨礱先賢有戒近者官纔昇於郎署位始置于郡符莫不高其閑閤廣以池榭非唯僭侈踰制實亦耗蠹傷財其百官第宅已造成者並許仍舊今日以後如更有創立新宅及屋宇高大者並委御史臺彈糾必嚴加黜責御

史臺所置六察分糾百司比來因循糾繩舉職起今以後諸司如有身名偽濫盜官錢及違法等事他時發覺者本察御史各並當貶斥考課之法前王所重蓋以綜覈吏理勵精政途名實苟違將何勸激宜準故事署內外知考使兼令中書舍人給事中各一人監考百姓困窮弊由姦吏政苟不擾民皆自安其司農寺供宮內及諸司厨冬藏菜並委本寺自供其菜價仍委京兆府納每年時價支付更不得配京兆府和市其諸陵守當夫

宜委京兆府以價直送陵司令自顧名並不得差配百姓寒食杏仁雞子月進土蘇白麥樹栽選場棘針修橋梁木便於本戶稅錢內尅折不得更令和市天下諸州縣應納義倉及諸色斛斛除準式每斗二合耗外切宜禁斷仍委度支鹽鐵分巡院及出使郎官御史切加訪察如聞今歲所在豐稔其義倉斛斛先有借用處委戶部勾當並須及時填足文武常叅官及諸州府長官子為父後者賜勲兩轉緣冊太子攝太尉稱賀攝侍中承

旨宣制進中嚴外辦攝中書令讀冊授冊各賜爵一級
其行事職掌官及書寶昇舉冊寶禮儀使禮官等三品
以上賜爵一級四品以下加一階撰冊文官特加一階
仍並賜物有差導引官各加一階造冊寶金字裝寶人
賜勲兩轉行事流外及禮生等各賜勲一轉文武常叅
官及陪位官并宗子諸親各賜勲一轉魯王府官未經
進改者量與進改其皇太子侍讀宜委中書門下精擇
二人具名聞奏天下孝子順孫先旌其門閭者及年高

廢疾者委所管州縣各加存卹五岳四瀆名山大川委所在長吏等量加祭祀布告遐邇咸使聞知

加冠

皇太子加元服制

元良所以主七鬯奉社稷貞于萬國祝以三加皇太子居長德之地務親仁之道爰就師保克修志業寢門問安而資敬太學齒胄而徵善大猷且酌元服宜申史稱周誦之年傳記魯襄之禮粵若敬始謂之成人逮乎建

正式展嘉事可以來年正月加元服所司擇日奏聞禮
官博士詳考故實允符令典

開元七年十二月

皇太子加元服宴百官詔

皇太子以守器之重有成人之業屬陽和肇歲甲子惟
日加元服乃循于舊章慶因雷游歡洎雲上王公卿士
中外襃褰布以慈惠廣茲匪頒應在會官一品一百疋
二品九十疋三品八十疋四品六十疋五品五十疋六
品五十疋七品四十疋八品二十疋九品二十疋諸州

都護都督刺史上佐諸軍及副使亦同在會例宜以當

處物給

開元八年正月

改名

皇太子諸王改名勅

勅古之名子必有象類人道之大可無慎乎皇太子鴻
及慶王潭以下往所製名或亦未協今以德命悉宜更
之太子鴻為瑛慶王潭為琮忠王浚為璵棣王洽為琰
鄂王涓為瑤榮王渙為琬光王浚為琚儀王濞為璲潁

王湮為璈永王澤為璘壽王清為瑁延王洞為琦濟王
溢為環信王沔為理義王泚為玼陳王漼為珪豐王澄
為珙坦王漣為瑱涼王浞為璿汴王滔為璈及惠寧王
文太子惠宣太子之子皆改從王

開元二十
三年二月

齒胄

皇太子國子監釋奠詔

庠序之興教自元子禮經之最奠始先師中古迄今斯
道無替皇太子隆基天資聖敬日就文明弦誦之業已

萬元良之德斯茂自外儲博望主器承華執經之問雖
勤用幣之儀未展今仲丁獻告有事兩塾備禮三尊宜

遵舊章俾緝徽典

景雲二年八月

皇太子詣太學詔

儒道有百王之政元良乃萬國之貞屬太學舉賢賓庭
貢士當其謁講故行齒奠所以弘風闡教尚德尊賢宜
有頒錫以成光寵陪位官一品宜賜五十疋二品三品
四十疋五品三十疋六品七品二十疋八品九品十五

足緣行禮及別職掌者各遞加一等六品以下五足為
等三品以下十足為等座主加二等學生賜物三足得

舉者及諸方貢人各賜五足

開元七年
十二月

唐大詔令集卷二十九

欽定四庫全書

唐大詔令集卷三十

宋 宋敏求 編

皇太子

監國

神堯命皇太子決斷庶政詔

太上皇崩命皇太子承乾知軍國事詔

太宗征遼命皇太子監國詔

太宗破高麗回怡攝命皇太子決斷機務詔

高宗命皇太子領諸司啟事制

則天太后命皇太子監國制

睿宗命皇太子監國制

允皇太子奏讓政事詔

明皇命太子監國總師從東討詔

肅宗命皇太子監國制

順宗命皇太子勾當軍國勅

穆宗命皇太子檢校軍國勅

文宗立潁王為皇太弟勾當軍國勅

武宗立光王為皇太叔勾當軍國勅

宣宗立鄆王為皇太子勾當軍國勅

懿宗立晉王為皇太子勾當軍國詔

僖宗立壽王為皇太子勾當軍國詔

昭宗命皇太子監國制

何皇后立輝王為皇太子監軍國令

傳位

神堯傳位皇太子詔

神堯命皇帝正位詔

睿宗命皇太子即位詔

睿宗令明皇總制軍刑政詔

明皇令肅宗即位詔

肅宗命皇太子即位詔

順宗命皇太子即位詔

順宗傳位皇太子改元詔

何皇后命皇太子即位詔

監國

神堯命皇太子決斷庶政詔

朕君臨率土劬勞庶政昧旦求衣思弘至道而萬幾繁
委成務殷積當辰日是實疲聽覽皇太子世民夙稟生
知識量明允文德武功平一海內九官惟叙四門以穆
朕付託得人義同釋負遐邇寧泰嘉慰良深自今以後

軍機時務兵仗倉糧凡厥庶政事無大小悉委皇太子
決斷然後奏聞既溥天同慶宜加惠澤為父後者若有
封爵皆令襲繼諸赤牒擬授職事官見任者並即為真
其已得替者叅選之日聽依階叙亡官失爵者量加擢
用逋租宿賦及先貢官錢物悉從蠲免文武官人節級
頒賜務存優洽稱朕意焉

武德九年六月

太上皇崩命皇太子知軍國事詔

朕以不天夙罹偏罰假息旦暮分沉苦壤仰賴先皇慈

恩鞠育爰自幼年至於成家未及弱冠仍屬亂離翼奉
義旗身當矢石克平多難任居藩屏遂復委以萬幾膺
茲景命祇懼虛薄弗克負荷日夜兢兢不遑寧晏加以
氣患屢幸九成晨昏定省廢於朝夕今歲停行盡行養
禮不謂殃罰深重太行崩背號天叩地無所逮及伏奉
遺詔追跡漢文以日易月降其常期顧命之旨誠不可
違然三年之喪自天子達殷周以來罔弗遵用漢文變
古有乖前式但慈顏日遠忻謂无由俯就之文理即遵

奉然朕之情切不可抑荼毒之心何可堪忍皇太子承
乾年過志學秉性聰敏頻年治國理務允諧今欲於東
宮平決朕得盡哀廬室終其喪紀望羣公卿士股肱王
室興言及此唯增哽絕朝多君子恕朕哀心

貞觀九年五月

太宗征遼命皇太子監國詔

朕以寡薄君臨區夏奉神祇之永命當億兆之重責宵
衣旰食憂六宮之未安寒心銷志懼一物之失所穢况
僻遠豺狼縱毒元惡尚稽乎天罰遺黎久陷於坑穽朕

是以發自渥澗言巡遼碣命元戎以先驅播凱澤於遐
裔省方之務既勞於躬親監國之重允屬於儲貳皇太
子治溫文表德睿哲日躋仁孝之誠彰於溫清絃誦之
美著於膠庠禮義既茂徽猷彌遠委以賞罰之權任以
軍國之政詳諸前載實惟令典發定州巡遼左之後宜
令太子治監國其宗廟社稷百神盛主祭軍國事務並

取決斷

貞觀十九
年正月

太宗破高麗回怡攝命皇太子決斷機務詔

朕粵在渺年時逢道喪懷生之類盡塗原野是用疚心
疾首攘袂救焚以戰場為俎豆以戎戈為章服夕不遑
寧思濟四方飢不及食推移一紀幸賴上玄幽贊下上
宅心忝承嗣厯勵精求政蠲百王之積弊振千紀之頹
綱旰食宵衣百齡行半洎乎至道方泰荼毒遽侵自九
年以來亟罹哀卹又屬高麗逆亂毒被韓夷微物不安
無忘隱惻遂復躬行弔伐遠涉遐荒時歷暄寒體親風
雨雖復靖氛海外有慰深衷久倦征遼乃多虛弊方今

兆庶殷阜六合廓清垂拱無爲允在茲日而皇太子其
令德遠彰所有幾務並可斷決百辟卿士咸宜受其節
度朕當親調五藥暫屏萬幾三兩月間且自怡攝

貞觀
二十

年三
月

高宗命皇太子領諸司啟事詔

東臺貳極之基道光於上嗣貞國之本事表於元良故
能創北搖之風敬東序之業功少海而逾潤浮前曜而
增華皇太子弘寢門標美壽街騰懿三善夙茂瑜珮以

之含鏘四學卑優班翰以之凝映正以年在冲幼未從
監撫雖調護方勤助琢磨之器而稼穡靡喻與德教之
途然為政之方義資素習宜令皇太子弘每五日於光
順門內坐諸司有奏事小者並啟皇太子主者施行

則天太后命皇太子監國制

鸞臺多難興王殷憂啟聖蕭牆之禍自古有之朕以虛
寡宿承先顧社稷宗廟寄在朕躬親理萬幾年逾二紀
幸得九玄垂祐四海乂安何嘗不日昃忘食夜分輟寢

戰戰而臨寶位虔虔而握聖圖憂百姓之不寧懼一物
之失所久親庶政勤倦成勞頃日以來微加風疾逆豎
張易之昌宗兄弟比緣薄解調鍊久在園苑驅馳錫以
殊恩加以顯秩不謂豺狼之性潛起梟獍之心積日包
藏一朝發露皇太子顯元良守器純孝奉親知此鸞萌
奔衛宸極與北軍諸將戮力齊心勦撲凶渠咸就梟斬
斯乃天地之大德幽明所贊叶者乎豈惟朕躬之幸抑
亦兆庶之福朕方資藥餌冀保痊和幾務既繁有妨攝

理監臨之寄屬在元良宜令皇太子顯監國百官總已
以聽朕當養閑高枕庶獲延齡可大赦天下

神龍元年正月

睿宗命皇太子監國制

張說

維天生人牧以元后維王立國貳以儲君將以保綏
家邦安固後嗣者也朕纂承鴻業欽若寶圖夜分不寐
日昃忘倦茫茫四海懼一心之未周蒸蒸萬方恐一物
之失所雖卿士竭誠守宰宣化緬懷庶域仍未小康皇
太子隆基仁智因心溫恭成德深達理體能辨皇猷宜

令監國俾爾為政其六品以下授官及徒罪以下並取

處分

景雲二年二月

允皇太子奏讓政事詔

朕恭臨宸極嗣守丕圖承九服之康寧當二儀之交泰
窅然汾水願遂放勛之遊皇太子諱孝德茂於周儲恭
慎超於兩漢翼宣景化允輔朕躬頃以宇宙事殷宗社
事重委以幾務叶贊謀猷志切承師情殷問道夏絃春
誦心存德藝威刑慶賞罔不當仁循省奏章嘉而不奪

景雲二

年四月

明皇命皇太子監國親總師徒東討詔

詔曰通三立極正維之業大明兩作離繼照之功博是以貞我萬國必在元良弼予一人歸之上嗣將寄丈人之律實資長子之師亦既戒嚴當除羣慝皇太子亨仁明植性孝友因心稟上德之粹靈宅中和之正氣恭敬之虔豈伊橋梓剛柔之適無取韋絃韞公忠而事君總文武而行已既不絕馳之美可稱問膳之勤心以三善

之明助百揆之務邇安遠肅天平地成屬凶險負恩稱
兵向闕人神共憤命爾撫軍將徼福於宗祧以保安於
社稷憑天之德何嚮不濟順人之心所戰必尅庶清彼
氛沴以寧我國家宜令太子監國仍即親總師徒以誅
叛逆取今月二十三日先務所司准式務從省便無使
勞煩布告遐邇咸令知悉

天寶十四
年十二月

肅宗命皇太子監國制

門下天下之本屬於元良四方之明資其繼照是有傳

歸之義必膺監撫之重克廣前烈與人守邦非君父之
獨親俾生靈之同戴朕號慕弓劍寢居線經頃以疾苦
未能康寧殘寇猶虞中原多壘軍國大務理須叅決乃
眷乇宅共承宗祧皇太子豫天縱聰明日躋德業中興
締構已有大功問安內寢占九國之夢制勝戎閫高五官
之才時方艱難禮在諒闇其以庶政委之元子宜令權
監國又以上天降寶獻自楚州神明告厯數之符奎璧
定妖災之氣總集瑞命祇承鴻休因以體元叶於五紀

其元年宜改為寶應元年建巳月改為四月其餘月並
依常數仍舊以正月一日為歲首受茲福應行以升平
因日月之重光布雲雨之渥澤其天下見禁囚徒罪無
輕重並已發覺未發覺已結正未結正四月十五日昧
爽以前一切放免左降官宜量移近處流人即一切放
回有司更不得輕有類例條件其楚州刺史并出寶縣
官及進寶官等量與進改隨進寶官等典儻各量與一
官宣示中外咸知朕意主者施行

司徒兼中書令

開

戶部侍郎

即同中書門下平章事兼知中書事臣元載宣德郎
檢校中書僉人臣楊綰奉行特進行侍郎上柱國韓
國公臣晉卿

闕

銀青光祿大夫行

黃門侍郎同中書門下平章事臣遵慶朝請大夫守
給事中臣液等言臣聞明兩作離所以照天下游雷
為震所以貞萬邦故書美元良易昭七宅伏惟皇帝
陛下聖德廣被仁風大洽匡復宗社弘濟艱難孝道

純深聖懷罔極居憂致毀恭默何言伏惟皇太子承
累聖之資稟自天之訓問安有禮無闕三朝保大成
功已申七德是命守邦之重允彰知予之明況神其
告符天不秘寶克昌景命必靜妖氛豈謝金縢啟翌
日之期玄符告彞倫之叙是故統元立極復舊惟新
因瑞以表年順人而定嗣宥過無大罔罔皆空俾人
遷善遐荒必被休徵昭具靈貺官吏沐其鴻私臣等
叨侍軒墀恭承典禮感戴之極倍萬恒情無任懇款

之至請奉制付外施行謹言

順宗命皇太子勾當軍國勅

勅朕承几聖之烈荷萬邦之重顧以寡德涉道未明虔
恭寅畏懼不克荷常恐上墜祖宗之訓下貽卿士之憂
夙夜祇勤如臨於谷而積疾未復至於經時怡神保和
常所不暇永惟四方之大萬務之殷不躬不親慮有曠
廢加以山陵有日霖潦踰旬是用警於朕心思答天戒
其軍國政事宜權令皇太子純勾當百辟羣后中外庶

僚悉心輔翼同底於理宣布朕意咸使聞知

永貞元年七月

穆宗命皇太子檢校軍國勅

勅朕獲嗣祖宗祇荷重器常恐失墜若陷泉谷而萬務所繫憂勤是切宿疹在體不遑自安陽氣歊蒸沉恙復作不能日臨庶政親領萬幾皇太子湛睿哲溫文孝敬明敏其軍國政事宜權令檢校百辟卿士中外臣僚宜竭乃心輔我元子同底於道以寧邦家宣布朕意庶使知悉

長慶四年正月

文宗立穎王為皇太弟勾當軍國勅

勅朕顧以眇身獲承丕構嚴恭寅畏十有五年列聖鴻猷朕豈能荷涉永匪懼馭朽非難雖宇內小康而大道猶鬱方自砥礪期臻洽平天不祐予夙嬰疾疹政慮多闕心靡遑安近者疑沍所侵久而寢劇臣僚愛我內外一心禱祀畢為藥石備至亟換旬朔有加無瘳懼不能躬總萬幾日釐庶政稽於古訓謀及大臣用建親賢以貳神器親弟穎王諱朕昔在藩邸常同師訓動成儀矩

性秉寬仁俾奉昌圖必諧人欲可立為皇太弟應軍國
政事便令權勾當百辟卿士中外庶臣宜竭乃心輔成
予志陳王成美先立為皇太子以其年尚冲幼未漸師
資比每念重難不行冊命迴踐朱邸允叶至公可依前
復封為陳王嗚呼萬務不可以久曠萬方不可以乏統
惟義所在朕不敢私宣布中外咸令知悉

開成五年
正月二日

武宗立光王為皇太叔勾當軍國勅

勅朕以微眇獲守宗祧祇荷鴻休懼不克濟乾乾夕惕

若涉春冰時晷忘疲宵分假寐而陽和布候同陰交爭
寒暑所侵乖於攝理忽嬰疾疚羸已經時漸覺衰羸藥
餌未效臣僚愛我中外叶心禱祝畢為針石備至皇子
冲幼未經師資軍國事重須選賢德稽於訓典謀及大
臣用建明哲以貳神器親叔光王怡宜改為忱植性忠
孝翼翼小心禮樂生知聰明天縱溫文敏裕博厚寬仁
言必依經雅符於詩禮動不違矩式合於典謨俾奉丕
圖必愜人欲可立為皇太叔應軍國政事便令權勾當

百辟卿士中外庶官宜竭乃心輔成予志嗚呼萬幾不可以久曠兆人不可以乏統惟義是守朕不敢私宣布中外咸令知悉

會昌六年三月二十一日

宣宗立鄆王為皇太子勾當軍國勅

勅朕以寡昧獲承丕構潔已以奉九廟恭已以臨兆人宵旰在懷罔敢暇逸而憂勞所迫蒸暑或加疾恙未瘳既踰旬朔萬幾繁重不能躬親詢於大臣稽以古訓永惟負荷之重思建儲貳之賢用舉徽章式固大本長子

邨王溫宜改名淮濬哲天縱孝敬日躋秉德不回出言可法英姿齊聖粹厚而恭道叶繼明義符立長可以貳於神器增輝前星宜立為皇太子權勾當軍國政事咨爾三事百辟內外臣僚宜協乃心敬輔元子罔違於道俾致時雍布告遐邇咸令知悉

大十三年八月九日

懿宗立晉王為皇太子勾當軍國詔

勅曰朕守大器之重居兆人之上日慎一日如履如臨旰食勞懷寢興思理涉道猶淺至化未弘而攝養乖方

寒暑嬰厲實有慮於闕政且無暇於怡神恙未少瘳日以寢劇萬務繁綜須有主張考之舊章謀於列辟思闡鴻業式建皇儲第五男普王儼改名儼孝敬溫恭寬和博厚日新令德天縱英姿言皆中規動必由禮俾崇邦本允洽人心宜立為皇太子權勾當軍國政事咨爾中外卿士洎於腹心之臣敬保胤子輔成予志各竭乃心以安黎庶布告中外知朕意焉

咸通十四年七月十七日

僖宗立壽王為皇太弟知軍國詔

門下朕幼荷丕構夙夜不遑蓋以三百年之鴻基十七
聖之大業守文重事偃武貞期惟懼冲人不克負荷果
致干戈四處寇盜連年再省藩維兩違陵廟上媿高祖
太宗之締構下慙中外羣后之匡扶既積殷憂俄成疾
疹而上天降祐中道獲痊萬乘還宮六龍挽駕御端門
而肆赦閱諸夏而駿奔雖有愧中興而克全舊物繫爾
中外方俟報功寧期瘡疾未瘳尚嬰沉痾徒思勿藥詎
報有徵賡理是加連綿莫療永惟八方之大萬務之殷

既不躬親固當壅滯朕親弟壽王傑天資穎悟生稟溫
文孝友通於神明仁愛格於上下必能體朕憂惕濟我
艱難用叶和平得就願養宜冊為皇太弟知軍國政事
咨爾內外大臣羣方庶尹悉宜聽監國處分盡心輔戴
寧國安人酌變從宜同底於理布告天下咸使聞知先啟
四年三
月六日

昭宗命皇太子監國制

門下朕以眇身祗膺大寶十有三載懼不克勝上荷祖

宗之靈托於兆人之上虛受謙益每勵於恭勤示儉守
文靡忘其宵旰而乃兩經播越薦興兵革生類莫躋於
仁壽理道未致於洽平尚賴左右大臣奠獎侯伯共戡
多難歸復神州豈我眇冲拯此艱運恭念高祖睿宗玄
宗順宗或經多難或苦沉疴遂厭萬幾授於令嗣是使
進退無爽孝慈兩全人心盡服其至公天性克彰於具
美近者忽嬰疾疹旦夕未瘳雖思養襟靈而亦循典故
皇太子裕溫恭有立和粹積中蘊孝悌以性成稟聰知

而夙慧動惟樂義進則思賢必能廣繼絕之心副傳歸
之命萬幾至重不可暫闕宜令皇太子裕監軍國事咨
爾中外匡弼將相卿士輔朕元子永孚於休凡厥庶務
悉宜聽監國處分布告遐邇當體朕意主者施行

光化
一年

十一月
六日

何皇后立輝王為皇太子監軍國令

門下我國家化隋為唐奄有天下三百年之盛業十八
帝之耿光聖上自纂丕圖垂將二紀雖恭勤無怠屬運

數多艱致寰宇之未康覩兵戈之屢起賴勲賢叶力宗
社再安豈意宮闈之中禍亂忽作昭儀李漸榮河東郡
夫人裴貞一等潛為逆節輒肆兇謀傷疚既深久及膚
革萬幾不可以久曠四海不可以乏君神鼎所歸頃有
纂紹輝王祚幼彰岐嶷長實端貞裒然不羣予所鍾愛
必能克奉丕訓以安兆人宜立為皇太子仍改名祝監
軍國事於戲孝愛可以承九廟恭儉可以安萬邦無樂
逸遊用寧寰宇百辟卿士佐茲冲人再揚我太宗之休

烈主者施行

天祐元年八月

傳位

神堯傳位皇太子詔

乾道統天文明於是馭歷大寶曰位宸極所以居尊昔
在勲華不昌厥緒揖讓之禮旁求歷試三代以降天下
為家繼體承基流朔相襲故能孝饗宗廟卜世長遠貽
慶後昆克隆鼎祚朕膺圖受理握國闡極大拯橫流載
寧區夏然而昧旦丕顯日昃坐朝馭朽兢懷履冰在念

憂勞庶政九載於茲今精華已竭耄期倦勤久懷物表
高蹈風雲釋累遺塵有同脫屣深求閒逸用保休和皇太
子世民早契禎符夙彰奇表天縱神武智蘊深機自雲雷
締構霸業伊始義旗之舉首創成規京邑克平莫非其
力及皇極已建天步猶艱內發謀猷外清氛祲英圖冠
世妙筭窮神伐暴夷凶無思不服薛舉負西戎之衆
武周引北狄之兵蝟起蜂飛假名竊號元戎所指折首
傾巢王世充藉府庫之資憑山河之固信臣精卒承間

守險建德因之同惡相濟金鼓纔振一縱兩擒師不逾
時戎衣大定夷劉闢於趙魏覆徐郭於譙兗功格穹蒼
德孚宇宙雄才宏畧振古莫儔造成大唐繫其是賴既
而居中作相任隆羣后百揆時總三階以平地居元良
實惟國本萬邦咸正庶兆樂推晷緯呈象休禎允集華
夏載佇謳訟知歸今傳皇帝於其所司備禮以時冊授
公卿百官四方岳牧爰及長吏下至士民宜悉祇奉以
稱朕意夫政惟通變禮貴從宜利在因民義存適要條

章法度不便於時者隨事改易勿有凝滯昔漢祖撥亂
身定大功羣臣推奉光宅帝位而事父資敬五日一朝
備禮尊崇稱號太上朕方游心恬淡安神玄默無為拱
揖憲章往古稱謂之儀一準漢代庶宗社之圖申錫無
疆天祿之期永安勿替布告天下咸使知悉

武德元年八月

神堯命皇帝正位詔

書曰知人則哲惟帝難之易曰通變則久使民不倦故
太伯端委周道以隆東海就國漢祚方永立權致治可

不然乎朕世濟縉衣家傳鼎鼐佐魏匡周勤勞王室有
隋御歷地居戚里常以補天在慮納揆為心大業道喪
皇極如燬傾維折柱天下分崩塗炭納隍黔黎殆盡顧
茲九有鋒鏑縱橫靜念一匡計無所出世民幼懷大度
性合天道蘊經緯之奇才抱湯武之宏畧深謀秘策沃
朕拯溺之心壯志雄圖起予救焚之志因其感激益廣
經綸糾合義師投袂而起車反於平陽之郊劍及於孟
津之會元戎所至冰銷霧卷曾未浹旬廓清京邑定非

常之業建不世之功三古以來未之間也朱旗西指則
仁杲喪元白羽東臨則世充泥首摧武周如拉朽收建
德若拾遺至於黑闥逋誅圓朗小醜三捷七擒不可勝
計一人之力冠今超古暴之遐邇豈待昌言以建成嫡
長冀其養德日就不謂罔思友于忌能毀善讒言屢發
始至鏖金賴天啟朕心宗社降福宥悟凶邪指麾殲殄
朕愧受浸潤深念元功乃敬授帝圖先天傳政懼其溢
滿驕上未稱三靈之心縱欲肆情不恤萬方之重朕故

仍居紫極處之肅成或察其復禮觀其齊政露往霜來
四載於茲矣比聞思我王度克艱克難昧旦丕顯去奢來泰
朝夕視膳蒸蒸之性日嚴仄景憂民翼翼情愈篤南越獻
賁北狄款關四海宴然五兵偃戢招君章之黨止用天
書屠師都之城無虧寸刃公卿輯睦遠邇又安金鼓絕
於疆場玉鏡懸於億兆盡善盡美吾無間然匪天祐之
孰能至此令月吉辰風調雨順朕俯觀人事仰答穹昊
自當養性便宮使其正居宸極宜令有司具禮務在周

備朕得脫屣高蹈擬跡於軒轅授歷傳璽爰屬於夏啟大
寶既固卜年惟永付託有所何樂如之百辟卿士等或
晉陽徒御同披荆棘或幕即故吏早預艱難至以德舉言
揚進忠顯効保入社稷天平地成惟當帶礪山河與國
休戚可以悉心匡弼無黨無偏罔或墮哉替爾丕績善
事元首稱朕意焉

武德九年八月

睿宗命皇太子即位制

賈魯

朕以寡昧虔奉鴻休本殊王季之賢早達延州之節昔

在聖歷已讓皇儲之尊爰暨神龍終辭太弟之授豈惟
衣冠所睹抑亦兆庶咸知頃屬國步不夷時艱主幼大
業有綴旒之懼寶位深墜地之憂議迫公卿遂司契象
日慎一日已至於今一紀之勞動亦至矣萬方之俗化
漸行矣將成夙願脫屣寰區昔堯之禪舜惟能是與禹
以命啟匪私其親神器之重允歸公授皇太子某有大
功於天地定阡危於社稷溫文既習聖敬克躋委之監
撫已逾年歲時政益明庶工惟叙朕之知子庶不負時

歷數在躬宜陟元后可令即皇帝位有司擇日授冊朕
方比迹洪古希風太皇神與化遊思與道合無為無事
豈不美歟三公百寮宜識朕意

延和元年七月

睿宗令明皇總軍國刑政詔

大寶之尊諒殊於為已神器之重必在於與能自昔興
王率由斯道我國家運光五聖業盛百齡大賚合於人
心淳風偃於區外而道不恒泰時更小屯朕以菲薄屬
茲多難抑讓王之宿志順公議於羣情丕業既康天保

斯定皇帝神武攸縱睿哲克躋安宗社於綴旒拯生人
於在溺用遵舊典令總朕師夙夜在勤刑政並理昨者
姦臣搆釁竊犯禁闈凶黨布於蕭牆飛變聞於惟扈朕
慮深倉卒爰命討除皇帝遂與岐王範薛王業等勵茲
孝心率彼義勇戮鯨鯢於闕下掃欃槍於天路元惡大
憝罔不伏誅人神用康功業彌廣信可總璫衡之大政
守家國之鴻緒能事備矣朕又何憂自今以後軍國政
刑一事已上並取皇帝處分其岐王範薛王業宜各實

封一千戶朕方高居大庭緬懷汾水無為養志以遂素心凡百卿士洎於黎庶宜體朕懷各盡臣節布告遐邇

咸使聞知

先天二年七月

明皇令肅宗即位詔

賈至

勅帝王受命必膺圖籙上叶天道下順人心不可以智求不可以力取是故我國家之有區夏也乾符疊委人瑞薦臻土應其德山呼其祚高祖當寶運太宗定鴻業高宗寧蒸黎中宗復舊績睿宗弘至理朕恭五聖之謨

訓師三代之淳樸常以道德為念不以富貴為心爰自
弱齡即尚玄默屬神龍之際邦家中否是用憤發掃除
機槍翼戴先皇再正宸極蓋宗廟是為宣朕私躬哉先
帝以朕有戡難之功命朕掌主鬯之任辭不獲已遂踐
皇極聿來臨御垂五十載常思我烈祖玄天之道保其
清靜之宗伊萬方事殷或日昃不暇食昔堯厭倦勤尚
以禪舜高居汾陽況我元子某睿哲聰明恪慎克孝才
備文武量吞海岳付之神器不亦宜然今宗社未安國

家多難其英勇雄毅摠戎專征代朕憂勤斯為克荷宜
即皇帝位仍令所司擇日宰相持節往宣朕命其諸禮
儀皆准故事有如神祇簡冊申令須及者朕稱誥焉衣
冠表疏禮數須及者朕稱太上皇焉且天下兵權制在
中夏朕處巴蜀卒應則難其四海軍郡先奏取皇帝進
止仍奏朕知皇帝處分訖仍量事奏報寇難未定朕實
同憂誥制所行須相知悉皇帝未至長安已來其有與
此便近去皇帝路遠奏報難通之處朕且以誥旨隨事

處置仍令所司奏報皇帝待克復上京已後朕將凝神
靜慮偃息大庭縱姑射之人紹鼎湖之事於戲禪讓之
禮聖賢高躅前代明王非不慕之皆享祚短促而不暇
也唯唐虞靈長能擅厥美俱革命易姓宗廟失尊非一
其心萬古不易之道也朕之傳位有異虞典不改舊物
其命維新奉禋祀於祖宗繼雍熙於宇宙布告億兆咸
使聞知

至德元年八月十六日

肅宗命皇太子即位詔

楊綰

於戲奉天地者是稱大寶承宗廟者必在元良吾以薄
德纂承丕緒今以憂勞所積遘疾彌留用申顧命誠爾
元子爾性稟生知幼有明德蒸蒸之孝言必因心溫恭
睿哲允文允武往在西土爰討兇渠命爾總戎克宣王
畧收復中夏唯爾之功遂昇以儲闡將中我鴻業爾有
令聞萬方宅心吾大漸之後即宜膺寶位夫天下至廣
神器所重丕承累聖之德虔奉大中之道必當任賢勿
貳去邪勿疑以慈惠為心開諫諍之路兢兢業業無怠

無荒嗚呼戒之無替厥命

順宗命皇太子即位詔

勅惟皇天祐命烈祖誕受方國九聖儲祉萬邦咸休肆
予一人獲纘丕業嚴恭守位不遑暇逸而天祐不降疾
恙不瘳將何以奉宗廟之靈展郊禋之禮疇咨庶尹對
越上天內愧於朕心上畏於天命夙夜祗慄深維永圖
一日萬幾不可以久曠天工人代不可以久違皇太子
純睿哲溫文寬和慈惠孝友之德仁愛之誠通於神明

格於上下是用舉皇王至公之道遵父子傳歸之制付
之重器以撫兆人必能宣祖宗之重光荷天地之休命
奉若成憲永綏四方宜令皇太子即皇帝位朕稱太上
皇居興慶宮制勅稱誥所司擇日冊禮布告中外令知

朕意

貞元二十
一年八月

順宗傳位皇太子改元詔

鄭絪

門下有天下者傳歸於子前王之制也欽若大典斯為
至公式揚耿光用體文德朕獲奉宗廟臨御萬方降疾

不瘳庶政多闕乃命元子代予守邦爰以令辰光膺冊
禮宜以今月元日冊皇帝於宣政殿仍令檢校司徒平
章事杜佑為使門下侍郎平章事杜黃裳充副使國有
大命恩俾惟新宜因紀元之慶用覃在宥之澤宜改貞
元二十一年為永貞元年自永貞元年八月五日昧爽
已前天下應犯死罪特降從流流罪已下各減一等布
告中外咸使聞知

何皇后命皇太子即位令

予遭家不造急變爰臻禍生女職之徒事起宮禁之輩
皇帝自罹鋒刃以至彌留不及顧遺號慟徒切定大計
者安社稷纂丕國者擇賢明議屬未亡人須爾建長策
承高祖之寶運繫元勲之忠規仗爾股肱以匡冲昧皇
太子祝宜於柩前即皇帝位其哀制並依祖宗故事中
書門下准前處分於戲送往事居古人之令範行令報
舊前哲之格言收淚宣布言不能喻

天祐元年八月

唐大詔令集卷三十

欽定四庫全書

唐大詔令集卷三十一

宋 宋敏求 編

皇太子

納妃

納蘇亶女為皇太子妃詔

開元十九年皇太子納妃制

開元二十一年皇太子納妃勅

令兩京選皇太子妃勅

冊妃嬪

冊皇太子蘇妃文

冊皇太子韋妃文

冊章懷太子張良娣文

退讓

降太子忠為梁王詔

廢退

廢皇太子承乾為庶人詔

廢皇太子瑛為庶人制

追復

息隱王追復皇太子詔

贈廢太子承乾恒山愍王制

贈重俊皇太子制

納妃

納蘇亶女為皇太子妃詔

配德元良必俟邦媛作儷儲貳允歸冠族秘書丞蘓亶
長女門襲軒冕家傳義方柔順表質幽閑成性訓彰圖
史譽流邦國正位儲闈實惟朝典可皇太子妃所司備
禮冊命主者施行

貞觀年

皇太子納妃制

龍樓內範輔成元良之德鳳邸中闈克諧樂善之美自
非門地薰茂容則聿脩何以式副好逑允茲華選薛紹
第六女竇希城第四女戚里承休渭陽傳慶婉順成性

柔閑有容言必圖史之規動遵珩珮之節惠問蘭郁心
清玉映足以儷青宮之寵伉朱邸之義式昭閭訓用光
嬪則紹女可皇太子妃城女可慶王妃仍令所司備禮
至都冊命

開元十九
年十月

皇太子納妃勅

張九齡

勅禮有謹於初義亦重其本凡是姻媾且猶正於人倫
況在元良更將承於宗祀皇太子鴻儲副是屬仁孝自
然爰從吉辰式備嘉禮上事下繼君子重之言告言歸

朕豈無慰非獨在予之慶宜申與衆之澤天下囚徒死
罪特宜免死配流嶺南遠處流罪降至徒徒以下罪並
宜釋放其造偽贗勾合知情受偽人等罪雖徒流仍便
隸為百姓至彼勿許東西諸道征行人家及鰥寡孤獨
委州縣長官檢校矜放差科使安其業中間有不支濟
者量事賑給仍量助其營種長安萬年兩縣百姓及今
月當上彊騎衛士雜匠掌閑幕士駕士工人樂人供膳
官馬主食弓等並免其家今年地稅三衛細引飛騎監上

門長及禮生有職掌者各減一年勞在京文武官九品已上見在外官因公使及當上在京新除五品已上外官未辭并致仕官朝朔望者各賜勲一轉東宮官九品已上及諸有司緣禮會祇供官等更加勲一轉五禮使兵部尚書兼中書令蕭嵩特封徐國公禮會使黃門侍郎同中書門下平章事韓休特與三品階禮會使少府監馮紹正賜紫金魚袋諸副使及判官更加勲一轉禮官儉者夾侍官及孔目官使典主旌節等擇日優與處

分仗內馬家內侍省級使教坊音聲人緣太子禮會祇
供者各賜勲一轉皇太子舅尚輦奉御趙迥遵特與三
品仍改與三品官前右威衛騎曹趙迥進特與五品仍
改與五品官皇太子侍讀侍書等各加一階其太子諭
德潘肅特與五品太子妃兄通事舍人薛愿特與五品
仍改與五品官兄吏部常選怵與五品仍與五品官今
日應預會官等各節級賜物即宜領取晏慰者所以宣
其情願錫者所以將其意公卿百辟庶知朕心

開元二
十一年

五月二
十一日

令兩京選皇太子妃勅

冢嗣其良家國之慶人倫之始宜娶元妃雖吉事尚須
待年而嘉耦宜深善教志於先定冀及義方屬在德門
遂成好合在東京委裴度西京委宰臣及申旨諭令本
宗家長舉言十歲已來嫡女及妹姪孫女兩月內送中
書門下務令宜稱無有不盡

開成元
年八月

冊妃嬪

冊皇太子蘇妃文

維貞觀年月日 云云 於戲惟爾秘書丞蘇亶長女族茂
冠冕慶成禮訓貞順自然言容有則作合春宮異協正
善曰嬪守器式隆萬葉備茲令典抑惟國章是用命爾
為皇太子妃往欽哉

冊皇太子韋妃文

維開元二十六年歲次戊寅七月戊辰朔十二日乙卯
皇帝若曰於戲天下之本實在於元良人倫之瑞是先

於內則咨爾忠王妃韋氏門承鼎盛質稟賢和勲中環
珮之節言成圖史之訓克明女憲無假於師氏能勤婦
道自合於國風固可以齊體儲位正位妃壺佇聞六行
之美以引三善之德是用冊爾為皇太子妃往欽哉爾
其祇服寵章光膺茂典協和以逮下恭儉以率先式昭
徽猷永保祚胤可不慎與

冊章懷太子張良姊文

沈佺期

維景雲二年歲次辛亥十月壬寅朔十日辛亥皇帝若

曰於戲咨爾故章懷太子良姊張氏家承閥閱世襲徽猷法度有章言容克備始應良選入奉元儲柔規緝於上下淑問揚於中間恩絕賓帝七日無歸義申從子百齡先謝言念窀穸憫悼良深追崇徽號典故斯在是用命某官某乙冊爾為章懷太子良姊魂而有靈膺茲寵數

退讓

降太子忠為梁王詔

詔曰昔泰伯高讓載昌姬宗東海之藩克隆漢祚故能
業傳端委作錫龜蒙飛茂實於前英播清虛於遠葉皇
太子忠分景扶木稟慶大津早加寵樹禮絕羣后比因
朝見屢陳撝挹論嫡庶之分守貴賤之禮以貴則皇后
有子以賢則不敢當仁前後數四辭情懇惻義高曠古
道邁前修宜遂雅懷以成厥美可封梁王食邑二萬戶
持節都督梁洋集壁四州諸軍事梁州刺史仍別食二
千戶賜物二萬段甲第一區梁州仍置都督府

顯慶元
年正月

廢黜

廢皇太子承乾為庶人詔

詔曰肇有皇王司牧黎庶咸立上嗣以守宗祧固本忘其私愛繼世存乎公道故傳季歷而樹姬發隆周享七百之期黜臨江而罪戾園炎漢定兩京之業是知儲副之寄社稷繫以安危廢立之規鼎命中其輕重詳觀歷代安可非其人哉皇太子承乾地惟長嫡位居明兩訓以詩書教以禮樂庶弘日新之德以永無疆之祚而邪僻

是蹈仁義蔑聞踈遠正人親昵羣小善無為而不背惡
無大而不及酒色極於沉荒土木備於奢侈倡優之技
晝夜不息狗馬之娛盤遊無度金帛散於姦慝捶楚遍
於僕妾前後愆過日月滋甚朕永鑒前載無忘正嫡恕
其瑕釁倍加訓誘選名德以為師保擇端士以任宮僚
猶冀中人之性可以上下蟠木之質可以為容愚心不
悛凶德彌著自以久嬰沉痾心憂廢黜納邪說而違朕
命懷異端而疑諸弟恩寵雖厚猜懼愈深引姦回以為

腹心聚臺隸而同遊晏鄭聲淫樂好之不離左右兵凶
戰危習之以為戲樂既懷殘忍遂行殺害然其所愛小
人往者已從顯戮謂能因茲改悔翻乃更有悲傷行哭
承華制服博望立遺刑於高殿日有祭祀營窀穸於禁
苑將加改葬贈官以表愚情勒碑以紀凶跡既傷敗於典
禮亦驚駭於視聽桀跖不足比其惡行竹帛不能載其
罪名豈可守器纂統承七廟之重入監出撫當四海之
寄承乾宜廢為庶人朕受上命為帝作人父母凡在蒼

生皆存撫育況乎冢嗣寧不鍾心一旦至此深增慙歎

貞觀十七
年四月

廢皇太子瑛為庶人制

朕恭承天命嗣守先業不敢失墜將裕後昆所以擇元
良策守器為國之本豈不謂然太子瑛幼而鍾愛爰加
訓誘親師之範所望日新年既長成與之婚冠而妃之
昆弟潛構異端頃在東都頗聞疑議所以妃兄薛愿流
謫海隅導之誨之謂其遷善駙馬都尉薛繡亦妃之兄

也今又煽惑謀陷弟兄朕形之言愧於天下教之不改其如之何蓋不獲已歸諸大義瑛可廢為庶人鄂王瑤光王琚等自幼及長爰加撫育為擇師資欲其恭順而不率訓典潛起異端及與太子瑛構彼凶人同惡相濟亦既彰露咸引其咎孽由已作義在滅親並降為庶人駙馬都尉薛繡離間骨肉惑亂君親潛通宮禁引進朋黨陷元良於不友誤二子於不義陰薄之行遂成門風皆惡跡自彰凶慝昭露據其所犯合寘嚴誅言念瑣姻

用申寬典捨其兩觀之罰俾就三危之竄可長流漢州百

姓開元二十五年七月

追復

息隱王追復皇太子詔

詔曰昔戾園敗德西都表其謚號楚英干紀東漢錫其
湯沐斯皆屈邦國之禁申骨肉之恩故也息隱王地乃
居長守器運初自貽伊戚陷於禍難日月逾邁松檟成
行朕嗣守鴻基緬尋遺烈何嘗不陟彼岡而靡覲瞻同

體而疚懷恩備哀榮式加禮命可追復皇太子謚仍依

前諡曰隱置陵令以下官并加戶守衛

貞觀十六年六月

贈廢太子承乾恒山愍王制

孫遜

門下理天下者必弘於在宥厚仁德者莫尚於追遠故
廢太子承乾昔在先朝嘗陷深過因是殛竄至於淪沒
雖臣子之罪義則不私而骨肉之親情則無絕况年代
浸遠典廢宜追言念往時已申公葬將崇後命是錫王
章式遵仍舊之封更表易名之謚可贈恒山愍王

開元二十

年四

贈重俊皇太子制

蘇頌

門下朕聞魯氏之孝也慈親惑於疑聽趙虜之族也明
主哀而望思歷考前聞率由舊典重俊大行之子元良
守器往罹構間困於讒嫉莫顧鈇鉞輕盜甲兵有此誅
夷無不悲惋今四凶咸服十起何追方伸赤暈之寃以
紓其黃泉之痛可贈皇太子主者施行

唐隆元年六月二十五日

唐大詔令集卷三十一